



14. februar 2022

UPA 2022/122

Inatsisartut ingerlatsinermut maleruagassaasa § 33 tunngavigalugu Inatsisartunut ukuningga aaliangiiffigisassatut siunnersuuteqarpunga::

**Inatsisartut aalajangiiffigisassaattut siunnersuut Naalakkersuisut peqquneqassasut akileraartarnermi aaqqissusseqqinnissamut siunnersuuteqassasut, akileraartarnermut ingerlatsineq ajornannginnerusoq, Kalaallit Nunaanni akileraarut ataatsimoortumik apparluni aammalu aningaasarsianut akileraarutit appartinneri ilaliullugu. Siunnersuut UPA 2023-mut saqqummersussanngorlugu suliarineqassaaq.**  
(Inatsisartunut ilaasortaq Jens-Frederik Nielsen, Demokraatit)

### Tunngavilersuut

Demokraatit akileraarusersuineq ajornannginnerusoq kissaatigaat. Kissaatigaarput akileraarusersuineq appasinnerussasoq. Aammalu kissaatigaarput innuttaasut sulillutik aningaasarsiarisimasartik annertunersaa paariinnassagaat.

Akileraarusersuinikkut aaqqissusseqqinnissaq aggersumut una uagutsinnut aaliangiisorujussuusooq.

Naalakkersuisut sivitsulersumi akileraartarnikkut aaqqissusseqqinnissaq suaartaatigisimavaat, kisiannili apeqqutit allarpassuit assigalugit Naalakkersuisut nipaatsumik matoqqasumillu sulinissartik aalajangersimavaat, ullorlu manna tikillugu tamarmik ilisimanagu qanorpiaq akileraartarnikkut aaqqissusseqqinniarneq isikkoqarumaarnersoq sunalu immikkut isiginiarneqarumaarnersoq. Naalakkersuisooqatigiinnissamut isumaqatigiisummi allaqqasoq una ilimanaateqarnerpaavoq:

*"Ukiuni arlaqartuni ilisimareersimavarput innuttaasut naligiinnerusumik oqainnerusumillu ulluinnarni inuunerminni atugassinneqassappata ataqatigiisumik akileraartarnikkut aaqqissusseqqittariaqarluta. Akileraartarnikkut aaqqissusseqqinnissaq atugarissaarnerunissamut aqqutissiusseqataassaaq. Ukiuni tulluittuni naligiinneruneq atugarissaarnerunissarlugu naalakkersuisooqatigiit aaqqissusseqqinnissamut aningaasanik immikkoortitsinissaq isumaqatigiisutigaat."*<sup>1</sup>

Demokraatiniit pingaaruteqarpoq akileraartarnikkut aaqqissusseqqinneq aalajangersimasumik sammiveqarnissaa. Taamaattumik 2022 aallartittoq Naalakkersuisunut akileraartarnikkut aaqqissusseqqinnissaq suaartaatigineqartarsimasoq pillugu apeqquteqaatinik nassiussisimavunga. Paasisaqarfigineruara Naalakkersuisut suna suliarineraat. Akissuteqaatimi una saqqummerpoq:

*"Akileraartarnikkut aaqqissusseqqinneq pingasunik siunertaqassaaq. Siunertaq siullermi nunatsinni akileraarusersuariaatsip pisariitsuunissaa, siunissamullu isumannaagaanissaa allaffeqarfiillu ikittuni suliariuminartuunissaa (pisariissuseq) qularnaarniarneqassaaq. Siunertaq tullermi akileraarusersuariaatsip inuiaqatigiinni nutaaliaasuni innuttaasut namminersorlutillu inuussutissarsiortut naammassisassatut naatsorsuutigisaasa politikikkut naammassineqarsinnaaneranik ilapittuisuunissaa siunertaavoq. Siunertat*

1

[https://naalakkersuisut.gl/~media/Nanoq/Files/Attached%20Files/Naalakkersuisut/GL/Koalitionsaftaler/Koalitionsaftale\\_KAL.pdf](https://naalakkersuisut.gl/~media/Nanoq/Files/Attached%20Files/Naalakkersuisut/GL/Koalitionsaftaler/Koalitionsaftale_KAL.pdf)



*pingajuanni akileraarusersueriaatsip innuttaasunit naapertuuttut naleqquttutullu kiisalu naligiinnginnerup annertusiarturneranut peqataaqataanginnissaata misigineqarnissaa siunertaavoq.”<sup>2</sup>*

Oqariartuutigineqartut pingasuusut imatorsuaq aklerlingilakka. Kisiannili siunertaq 2 aamma 3 qaavinnarsorpallaartumik tunngavilersorsoraakka, taamaattumillu tamanna tunngavigalugu siunnersuut toqqaannarnerusoq saqqummiukkiga taamaasilluni Naalackersuisut piareersaatimini suliaqarneranut siunniussaqaqarnerulersikkumallugit.

Tamatumalu avataasigut ernummassuteqarpunga, Naalackersuisut apeqquteqaatinnut ima isikkulimmik akissuteqarmata:

*”Erseqqissarneqassaaq aaqqissuuseqqinneq ataatsikkut imaaliannaq aalajangerneqartanngitsoq. Suliniutit allanguutillu ataatsimut pingaarnertut siunertamik qulakkeerisussat pineqarput. Taamaammat aaqqissuuseqqinneq ukiorpaalunni, qinigaaffillu arlallit ingerlaneranni pissasoq naatsorsuutigineqartariaqarpoq. Suliniutit ilaat piaartumik naammassineqarsinnaapput, allalli ineriartortinnissaat sivilunerussalluni.”<sup>3</sup>*

Oqariartuut tamanna isumaqarpoq innuttaasut piffissaq qaninnermi qulakkeersinnaangikkaat aningaasaatitik paarinerulernissaannik. Taamaattumillu aamma siunissaq takutitsingilaq akileraartarnikkut aaqqissuuseqqinneq inuiaqatigiinnut pitsaaneruseq inissisimalersitsissasoq. Demokraatinut tamanna akuerineqarsinnaangilaq, tamannalu tunngavigalugu siunnersuutigineqartoq Naalackersuisunut kalerrisaarutiginiarparput aqut eqqortoq atorineqartariaqarneranik.

Akileraartarnikkut aaqqissuuseqqinneq siunnersuutigineqartut aallaavigalugit ingerlappat inuunerissaarneruneq qulakkeerneqassaaq, akissaatikinnerillu aningaasaat annertunerusut paarinerulertussaallutikkut. Aningaasatigut naligiinneruneq annertuumik eqqarsaatinniingilaq. Uannut aningaasatigut naligiinneruneq pingaartut inissisimangilaq. Uannut pingaarnarpaajuvoq akissaatikinnerit aningaasaateqarnerulernissaat. Isumaqarpunga suna tamaat akigalugu aningaasatigut naligiinneruneq periuseq kukkunerusoq, kingunerisinnaammagumi pigissaarneruneq piitsunngornerulersitsiinnartoq.

Inatsisartuni partiit aammalu Naalackersuisut oqallinnermi isummernissaat qilanaaraara.

### **Pisortanut aningaasatigut allaffissornikkullu kingunissai**

Naalackersuisut suaarutigereerpaat akileraartarnikkut aaqqissuuseqqittoqarnissaa<sup>4</sup>. Taamaattumik siunertamut Naalackersuisut aningaasatigut allaffissornikkullu nukit atorineqartussat pisariaqartinneqartut immikkoortereersimanissaat tunngavigineqassaaq. Siunnersuut una aningaasartuuteqarnerulersitsinaviangilaq, kisiannili siunertaqarneruseq akileraartarnermut aaqqissuuseqqittoqarsinnaallissalluni.

### **Namminersorlutik inuussutissarsiteqartunut aningaasatigut allaffissornikkullu kingunissai**

Soqanngilaq.

<sup>2</sup>[https://ina.gl/documents/para3637/2022/svar/001\\_2022\\_skattereform\\_JFNI\\_akissut.pdf](https://ina.gl/documents/para3637/2022/svar/001_2022_skattereform_JFNI_akissut.pdf)

<sup>3</sup>[https://ina.gl/documents/para3637/2022/svar/001\\_2022\\_skattereform\\_JFNI\\_akissut.pdf](https://ina.gl/documents/para3637/2022/svar/001_2022_skattereform_JFNI_akissut.pdf)

<sup>4</sup>[https://ina.gl/documents/para3637/2022/svar/001\\_2022\\_skattereform\\_JFNI\\_akissut.pdf](https://ina.gl/documents/para3637/2022/svar/001_2022_skattereform_JFNI_akissut.pdf)



**Innuttaasunut aningaasatigut allaffissornikkullu kingunissai**  
Soqanngilaq.